

Tolak Ideologi Politik Berpaksi Emosi Demi Perpaduan Melayu Pulau Pinang
Bernama
9 September, 2012

KEPALA BATAS, 9 Sept (Bernama) -- Masyarakat Melayu Pulau Pinang digesa agar tidak terpengaruh dengan ideologi politik yang berpaksikan emosi sehingga mereka hilang keupayaan bersaing dengan kaum lain.

Timbalan Ketua Umno Bahagian Tanjung, Datuk Raja Munir Shah Raja Mustapha berkata orang Melayu perlu menguasai ilmu pengetahuan, ekonomi dan kedudukan sosial untuk memastikan survival kaum itu dalam masyarakat.

"Jika dilihat dari segi kemandirian orang Melayu itu sendiri, perpaduan memainkan asas utama yang akan dapat memastikan orang Melayu terus menikmati keistimewaan yang diberikan.

"Bagaimanapun, masih terdapat kekurangan kepada orang Melayu. Kalau kita lihat dari segi perumahan, ekonomi dan pelajaran contohnya walaupun terdapat peningkatan dari tahun ke tahun tetapi kalau dibandingkan dengan kaum lain di Malaysia rasanya kita masih ketinggalan dalam mencapai kemajuan," katanya pada Forum Nusantara Siri 6 bertajuk '55 Tahun Kemerdekaan: Ke Arah Mana Melayu Pulau Pinang' di sini, Sabtu malam.

Forum itu turut membariskan Anggota Parlimen Parit Buntar dari PAS Datuk Dr Mujahid Yusof Rawa, Senator Dewan Negara Prof Madya Ariffin Omar, dan Anggota Dewan Undangan Negeri Sri Setia dari Parti Keadilan Rakyat (PKR) Nik Nazmi Nik Ahmad sebagai panel jemputan.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=693208>